

大雲山房全集

冊一

大雪山圖卷全圖

大雲山房集

四倍齋要

大雲山房文稿通例

一雜著文諸子家之流也故漢魏以來多自書子集中皆書字用王子淵法也序記文多自書余宋人稱人曰賢自稱曰愚亦入之序記集中皆書名碑志文漢魏本文不入撰人名集中入撰人皆書名用韓退之法也傳文後書論曰用班孟堅法也

一大傳本史書體故韓退之傳陸贄陽城不入本集後人有入本集者或自存史彙或爲史官擬彙而已集中無大傳其小傳外傳傳中必書名祖父及傳中所及之人雖貴且賢必書名祖父賢始見子孫亦然妻妾有故始見傳非碑志體也官與地必書

本朝之名紀實也爲異姓作家傳非正例集中同姓家傳名書諱某不書姓不書所籍子孫之言也傳中所及之人書某公某名某君某名儒者書某先生某名與祖父交尊之也存其名記事之體也遠祖家傳所交之人止書姓名世不及也

一大傳書名書字不書號史法也儒者於傳中事別書稱某號先生亦史法也外傳小傳或書號或書別號道號著性情也古者幼名冠字故於名下書字世人加字於名上者非也集中名字并書者字皆在下號或取地或取所居始六朝之稱清溪大山小山禪者亦稱南嶽青原至宋人人稱之世人止稱號而加於名之下是稱其人而後綴其地及所居亦非也集中名號并書者名皆在下別號如漫郎醉吟先生道號如華陽真逸無垢居士集中有故則書

一傳目自漢書以下皆書名史記或書名或書字或書官或書爵集中家傳皆書號書先生外傳小傳皆書字或書人所稱如曹孝子是也

一碑志文較史傳例稍寬集中凡文中所及之人書某官某姓公或某姓君再書名其滿州蒙古不紀其氏者書某官某名公或某名君用元色目人例也紀其氏者書如漢人

一碑志文目書階官書職官書爵書諡此通古今例也古人集多不畫一者

集中止書職官其階爵諡於文中見之書石則目具階職爵諡用當時法也

一集中碑志文目監司以上書公以下書君成一家學者書先生所尊書府君友書字婦人書所生之姓姓所以別女子也其夫之姓文中見之

一集中碑志文目止書某公某君某府君其妻之合葬者文中見之以合葬志非古法也祔葬志書祔葬從夫之義也

一集中遺事述書法如碑志行狀行略書法亦如碑志書事之書法如傳墓表有列銘及詩者變例也集中皆不列銘及詩碑記列銘及詩者正例也集中皆列銘及詩壁記則無之其壁銘有序者書并序以別於壁記也

一碑志文有序有志有銘記作文緣起序也記事及葬年月志也詠歎之銘也集中志文有作文緣起者目書并序餘不書其有志無銘者目止書志志略者目止書銘碑文皆書碑銘不書并序碑以無序爲正例也

一爾雅歲名歲陽二章曰歲在甲歲在寅而以闕逢攝提格名之太史公律

曆志書闕逢攝提格而年表書甲子後儒謂年不書甲子者謬說也然尙書春秋皆書年數各史書因之故記事之文以書年數爲是集從之

一碑志文書甲子則不書日數書日數則不書甲子正例也集中有書日數并書甲子者以之別疑表信變例也書越三日戊申越五日甲寅其法也
一集中碑志文書始遷祖及曾祖以下其高祖有功德則書書母書前母繼母生母不書曾祖母祖母其書者變例也書妻書子書女不書孫以孫應書其父之碑志也有故則書集中有應書之人而不書者必有當絕之道焉此春秋之義也傳文中亦用之

一集中碑志文必書葬月日及地不書者乞文時未卜月日及地也必書曾祖以下及官名其書某官某名止從某某者狀失體不官不名或失體不及其上世也

一集中碑志文曾祖以下有官者書職官卒後贈職官亦書至子孫貴封贈官止書階官以不治事也

一集中傳文止書某年進士舉人不書某科史法也碑志文書鄉試中式會試中式

殿試

賜進士及第出身同出身詳之也

一集中序文地名據今時書之官名亦然其或書古官者自唐以後人多稱古官至今沿之存當時語也碑志文述人言書古官者亦存當時語也書上書言事皆與序文同記文不書古官紀實也

一集中書上書目皆書姓書官座主舉主及所受業稱先生其目書官文中書先生者非所受業也友書字其書號者或其字不著或其字不應古法如號之取地取所居也漢人友稱字唐人稱行宋人稱官於所學稱號自明以來及門俱稱號矣時爲之也

一集中書上書首必書某人閣下足下執事末必書某月日某謹上以別於尺牘也

一禪悅文古人入外集以爲佛家言也集中辨正經論者仍不入外集辨正道家言亦然

一史記漢書載四言詩歌行晉唐書以後載五七言古近體詩此史法也文家載詩則格下集中載詩者皆入外集詞曲不載

一集中文格近者亦入外集

一詩目唐人或書行或書名或書字或書今官或書古官或書所官之地宋元明人或書號或書世所妄稱之官如總制宮諭是也集中書號書古官不書所官之地號亦地名不可與所官之地相沓也不書妄稱之官懼雜也一人再見不書姓遷官者改書官其年數六朝以後皆書甲子集中從之

一詞目以曲名爲目次行低一格注題不注題者皆無題也

惲子居先生行狀

宜興吳德旋撰

先生姓惲氏諱敬字子居一字簡堂世居武進縣之石橋灣祖諱士璜考諱輪兩世並以先生貴

贈封文林郎母鄭孺人先生幼學於父少長從舅氏鄭環夢暘遊然持論好獨出己見長老皆驚異焉中式乾隆四十八年癸卯科本省舉人五十二年充咸安宮官學教習時同州莊述祖珍藝莊獻可大久張惠言皋文海鹽陳石麟子穆桐城王灼惲生先後集京師先生與之爲友商榷經義古文而尤所愛重者皋文也五十五年教習期滿引見以知縣用五十九年選授浙江富陽縣知縣皋文爲序以送其行其略曰夫爲令之道六經孔孟之所述皆子居向時之道也以子居爲之其不可以至耶曰吾不爲彼之所爲而已豈子居向時之道耶君子出其言則思實其行思其行則務固其志固志莫如持情實行莫如取善子居勉之矣先生曰善敬敢不求從良友之規旣至富陽銳欲以能自効矯然不肯隨羣輩俯仰大吏憚其風節欲裁抑之令督解黔餉先生曰王事也

怡然就道返自黔中調知江山縣父喪去官時嘉慶元年十一月也四年服闋入都謁選明年四月選授山東平陰縣知縣引

見改授江西新喻新喻吏士素橫藐視官長輕

朝廷法先生至痛懲創之人疑先生之爲治過猛也已乃進其士之秀異者與之講論文藝斷事不收聲必旣其實士民懷德畏威翕然大變於其舊七年張皋文歿於京師先生聞之慨然曰古文自元明以來漸失其傳吾向所以不多作古文者有皋文在也今皋文死吾當并力爲之先是皋文與今禮部侍郎蕭山湯公金釗講宋儒之學是時先生方究心於黃宗羲明儒學案有所見輒筆記之未及與皋文辯論往復也及皋文卒先生爲書與侍郎其略曰濂洛關閩之說至明而變至

本朝康熙閒而復其變也多歧其復也多仍多歧之說足以眩惑天下之耳目姚江諸儒是也多仍之說足以束縛天下之耳目平湖諸儒是也二者如揭竿於市以奔走天下之人故自乾隆以來多懸置之懸置之者非也揭竿於市者

亦非也且如彼此之相置前後之相搏益非也夫所謂濂洛關閩者其是耶其
揆之聖人猶有非是者耶其變之仍之者是非其孰多耶知其是非矣何以行
其是去其非耶蓋先生嘗自言其學非漢非宋不主故常故其說經之文能發
前人所未發而世之論先生之文者乃以爲善於紀述而說經非所長焉十年
調知瑞金縣瑞金在萬山中俗好訟鬪素稱難治先生張弛合宜吏民咸就約
束有所論決問法何如不可干以非義瑞金諸生楊儀招倚富姦逼佃戶女事
發到官願進千金求脫罪先生峻拒之後屢邀人關說至以萬金相啗先生曰
吾自作令以來苞苴未嘗至門今乃有此豈吾有遺行耶卒論如律先生廉名
素著至是人益信之十五年大吏以先生治行第一保舉卓異十一月至京師
明年三月引

見回任候陞是歲刻大雲山房文稿成又明年守南昌府吳城同知十九年以
奸民誣告家人得贓失察被劾黜官先生爲人負氣矜尚名節所至輒與上官
忤上官以其才高每優容之而忌者或銜之次骨及誣告事起當是時前撫刑

部尙書金公光悌薨於位今兩廣總督阮公元自河南調撫江西未至布政使方護理巡撫印務惜曰憚子居大賢乃今以賄敗先生既擯不見用士大夫之賢者咸爲先生惜且冤之而先生不以介意益務爲文自壯初先生之再謁選也石橋灣故居已奉其先府君遺命讓兩從父居之自挈兩弟奉鄭孺人之官至是假館所親無寧居屬有門下士官安慶知府試往謀之道遇疾歸歸寢十日而卒先生生於乾隆二十二年丁丑二月初一日卒於嘉慶二十二年丁丑八月二十三日春秋六十有一配孺人陳氏繼配高氏子一人弟之子穀也嘗從予遊女七人長適歸安姚晏餘皆未行孫二人尙幼先生既卒之三月余始從穀求遺書得大雲山房文稿都若干卷外集及詩詞各若干卷歷代衣冠圖記未成其治獄別有子居決事四卷先生之治古文得力於韓非李斯與蘇明允相上下近法家言敘事似班孟堅陳承祚而先生自稱其文自司馬子長而下無北面先生所欲有爲於天下者具見文集中以在下位不獲有所施設然後之人讀其書足以知其志之所存也先生於陰陽名法儒墨道德之書既無

所不讀又兼通禪理以爲心之故惟聖賢能知之而言之佛與學佛者亦能知之而言之大學正心修身章與金剛經應無所住而生其心句相合故嘗謂余云論學貴正而不執然不可雜雜則不正矣蓋其所自得者如此覈以所述先生年譜示余余病其未備也乃更參以所聞見及先生文集爲狀如右謹狀

大雲山房文稿初集目錄

陽湖惲敬著

卷一目錄

原命

喻性

說地

說山

三代因革論一

三代因革論二

三代因革論三

三代因革論四

三代因革論五

三代因革論六

三代因革論七

三代因革論八

西楚都彭城論

辯微論

續辯微論

釋夢

釋拜

釋弁一

釋弁二

釋弁三

釋鉤

駁史伯璿月星不受日光辯

駁朱錫鬯書楊太真傳後

雜記

雜說

張真人府印說

得姓述

卷二目錄

九江考

康誥考上

康誥考中

康誥考下

周公居東辯上

周公居東辯下

顧命辯上

顧命辯下